

四庫全書

史部

欽定四庫全書

廣西通志卷九十一

土司人物

土族土民附

土司建置附見秩官大都中原氏族以從征立功
食土於茲顧子孫傳世久遠或轉變於夷壤之侏
儻荒鄙者習圉故也然粵乘所載如宋岑翔明岑
芝黃暘韋國相諸人東身効忠守禮導俗即華士
無能先之謂非降喪恒性天良有不終墜滅者乎

今者協和風動

帝光天之下罔不率俾凡茲土姓亦庶幾蒸蒸

雅化而不扶自直矣列而志之揚彼先躅垂厥後昆俾

無忘象賢保世也亦曰體善善欲長以廣為風厲

云爾

宋

岑翔先世浙江餘姚人曾祖仲淑從狄青征儂智

高留知永寧軍遂家焉崇寧間歸化州蠻亂翔募

義兵平之以州內附授知州繼陞沿邊溪峒安撫
使夷俗陋惡歲時殺人祭鬼婚姻多野合兄弟死
輒娶其妻小有忿爭仇殺相尋甚且掘人祖墓藏
其骸骨翔悉為禁草蠻俗一變

叅舊志

明

岑瑛思恩世職始祖仲叔隨狄武襄征蠻有功封
武陰侯其子封思思土知州歷世相承迨明傳至
瑛生而勇畧過人正統間常奉征調屢著功勳遂

進州為府秩加都指揮使瑛撫有思土愛民輯士
更復好學鼎建黌宮請設官師思恩有學民知讀
書蠻夷習尚一變者實瑛為之倡也瑛沒民人感
頌所在皆有廟祀歷今猶稱戴其德

舊志

黃琮思明府土官廣成子也思明州缺守當道知
琮賢檄署州事會交趾侵西平琮往禦之賊退即
勒兵歸或問之琮曰吾以孤軍遠留邊境設不能
守為盜奪印去損威失職矣衆服其持重景泰二

年府亂復檄琮署府事琮夙夜圖維克定其亂成
化初授承事郎琮弟璣當府亂時民心搖机或謂
璣曰盍行矣璣曰是吾父母邦吾安往哉出任其
事上書督府請兵致討都御史李棠執首亂誅之

民賴以安

太平府志

黃鉷思明土官黃瑀次子喜讀書有勸之仕者鉷
曰吾讀書為賢人使吾父為賢者父其榮大矣一
官何足為親榮宗族咸稱之凡事有疑難質之鉷

一兩言決弟鐸幼負奇氣性甚孝瑯及於難鐸即
憤心奮志欲手刃父仇人解之曰君欲為父報仇
而先自輕其身則失報仇具矣反貽仇家笑乃止
而陰誓諸江曰所不為父報仇者有如江後竟復
其仇交夷聞鐸名皆懾伏

節太平府志

陸祥思明土府人任俠有謀畧善應對女配黃瑯
子鈞景泰間鈞襲職瑯嫡子鈺怨問計於竝竝遣
子震徵兵思明夜襲瑯鈞殺之鈞子道甫在襁褓

祥負之避患控訴各上官都御史李棠誘執竝球
球死於獄郡人為立道祥力居多

節太平府志

黃逗鈞庶長子少英敏好學塵視軒冕有談及勢
利者輒鄙其人
不為禮嘗採古豪傑行事書之於
壁苦節勵行恂恂若寒素子演沉實端謹舉動守
尺度嘗曰古聖賢立法甚嚴幾希之間一失足即
流於狂為聖賢罪人繪天下名山水於座右想像
龍虎氣脈所由始終既一年意得神悟遂精堪輿

之理

節太平府志

岑芝田州土知州州自弘治以來變亂四十餘年
流離載道蓬蒿滿目芝加意拊循招集散亡漸有
寧宇修建義學擇土民子弟教誨之事祖母極孝
飲食必侍側有疾必親奉湯藥不解衣而寢嘉靖
二十年南海黎賊作亂芝奉調從征抵瓊州督戰
殺賊數十人以外援不至而死其土兵同時死者
亦數百人

參舊志

黃暘思恩那馬土司人以府儒學廩膳生承襲司
職嘉靖三十五年調征南贛有功陞行都司僉事
加同知服俸致仕撫民有功民感其澤立像祀之

舊志

黃受山那馬司官族賦性淳朴家無中產而樂善
好施每歲凶必盡力賑濟閭里賴之有子十二人
各授一業年八十舉鄉飲耆老

舊志

岑懋仁田州土知州萬曆三十五年交趾作叛攻

破歸順下雷等土司懋仁奉調征勦擊敗交賊多

建功績授叅將尋加總兵服

思恩府志

黃大耀那馬司人歲貢黃中正之子幼承父訓能

文章崇禎時補弟子員未幾丁父母艱哀痛嘔血

成痼疾遂以耕種為業不營外事饗殮有餘輒貯

以周濟值歲歉陰行賑恤受者不識其面歷數十

年樂善不倦

舊志

許桂芳上映土州知州崇禎十一年交夷內侵首

劫近州村寨殺擄人畜桂芳奮統目兵陷陣追斬
六十餘人賊遂退散復調征五都山寇生擒賊首
法保神會扶斷等斬級百餘總兵驗功叙奏給賞

思恩
舊志

黃世勲思恩舊城司土巡檢崇禎十五年隨本府
朱國玘征勦武緣妖賊馬日仙奮勇行陣賊平以

功題加知州銜

思恩府志

盧花那馬司邕造村民性謹厚人久與之居終不

見有疾言遽色鄉里因之感化好施濟或以緩急告無不如其請崇禎十五年土司具狀呈郡守敦

禮鄉飲壽至九十三

舊志

韋國相興隆司官族平居嚴恪以禮自處亦以禮處人雖朝夕燕見必冠服相對睦鄰敬宗年過八十猶率履不衰崇禎十七年司官具其事上本府

優獎耆行

節舊志

國朝

王萬化白山司土巡檢事母至孝純篤不懈後因病乞休以子如綸襲優游林泉三十餘年修行恂謹為子族輩矜式舉鄉飲

思恩府志

潘如祿安定土司巡檢康熙十三年偽逆叛亂如祿忠節自矢藏印不繳被追逼領偽印抗不赴幾遭屠戮十五年將軍傅宏烈提兵出廣肇如祿率先迎請

王師給總兵劄銜令聯絡各土屬合兵破賊乘機圖

進取滇黔如祿馳驅戎行以司事交子宗藩及其
宗人土目等代理十八年廣西平巡撫將軍傅以
如祿禦賊事兩具疏入奏

朝議如所請准給劄嘉獎之

廣西通志卷九十一

欽定四庫全書

廣西通志卷九十二

諸蠻

安南附

南丹廣源撫水環州種落夥矣其言語侏儻衣裳
爛斑其俗尚貪利輕生其性外駸而內黠唐宋之
世羈縻而已有明如斷藤峽如府江八寨古田用
兵無虛日威克有之矣能以德化乎

國家仁育義正凡有血氣莫不尊親往者化外諸蠻

咸力稽輸賦與齊民埒近且有入膠庠與秀民伍者同風之盛不已卓越千古哉安南終有明之世黎莫相攻叛服無常我

朝來享來王罔敢或愆粵西為其貢道所經故不以屬國而置之昭大同也且使任封疆者知所控馭焉志諸蠻

蠻習各種

嶺表接壤荆楚溪峒聚落悉為南蠻其種非一曰

猯曰獐曰獠曰狼曰狔曰豸曰獾曰狍曰狨曰狝曰狨曰狝

曰狸曰蚤皆性習獷野罔知禮教顧史載槃瓠事

以謂是諸蠻之祖此何以稱焉

後漢書昔高辛氏有犬戎之患帝購

其將吳將軍頭金千鎰邑萬家且妻以少女時有畜狗名曰槃瓠遂銜吳將軍頭造闕下帝不得已

以女妻之入南山生六男六女自相夫妻衣裳斑攔言語侏儻女歸以狀白帝賜之名山廣澤具後

滋蔓號曰蠻夷

夫載籍極博必考信於六藝而孔子刪書

斷自唐虞怪誕之語豈儒者所宜出哉至於種族

有飛頭

炎徼紀聞謂能以頭飛去求食飲

鼻飲

與之酒能以鼻飲輒盡

蚤人

入水能視以繩繫腰使沒海求珠

盧亭之屬

匿海中漁者以罾網得之

其說尤

荒幻不經而州里巢窟均莫得而詳識云周禮南

方曰蠻雕題交趾有不火食者

雕題刺繡花紋以飾額也交趾國名

按尚書宅南交謂地界中國之南與之交錯故曰南交疑交趾亦此意或謂男女同浴又謂交人足趾相交皆未協大抵微外地名多無意義必求其解以實之則鑿矣其人斑衣椎跣

其嗜味飮冷咽生不厭濁穢其語言鳩舌其窟宅

毒菁瘴篁其性桀驁猜忍讎殺不解其習烙蹠善

走其徒風颺霧集其伎勁弩藥鏃短刃樂戰好則

人怒則獸故在滇曰猓獠曰獠猓在黔曰狝曰狝狝
獠曰狝家在楚曰狼獠亦以苗稱而在粵則名猓
獠其曰狝狝獠又猓獠別種也若其大姓如昔
之廣源西原環州宜州南丹撫水安化諸蠻則但
謂之蠻為能糾合諸族不以猓獠稱大抵桂平多
猓獠梧州多狝狝獠人南柳慶多獠獠狝狝思太
泗鎮多土狼兵其最悍負險者昔稱古田碎江巖
塘府江藤峽十排八寨五山七山六十三山前朝

時肆叛逆撫馭方畧語在馭蠻記中夫廣川大谷
民生其間異俗王者大無外含生之屬茹毛飲血
靡不脗與至其名以種殊習隨尚異亦任之而已
而好事者推本於五溪荆蠻蓋三代之世楚有分
地荆蠻之跡見於春秋而粵乃開自秦漢今以禹
跡所未經而遠稽帝嚳系以槃瓠於義何所取於
事何所徵耶

徭

犛人八蠻之種也椎髻跣足衣斑爛布褐采竹木
為屋繩樞葦竇覆以菁茅種禾黍粟豆山芋雜以
為糧暇則獵山獸以續食嶺磴險阨負戴者悉著
背上繩繫於額僂而趨履險若飛兒能行燒鐵石
烙其跟蹠使頑木故能履棘茨根枿而不傷兒始
生稱之以鐵如其重漬之毒水兒長則煨其鋼製
刀試刀必斬牛仰刃牛項下以肩負刀一負即殊
者良刀也弩名偏架以一足蹶張背手傳矢往往

命中鎗名棹鎗長二丈戰則一弩一鎗相將而前
執鎗者前卻不常以衛弩執弩者口銜刀而手射
人或冒刃逼之釋弩取口中刀奮擊退去必有伏
弩歲首祭先雜揉魚肉酒飯於木槽扣槽羣號為
禮十月朔祭都貝大王男女各成列連袂相攜而
舞謂之踏搖樂有鏡鼓胡盧笙竹笛之屬衆音競
闕擊竹箏為節山田無幾天少雨稔種不收無所
得食則踉蹌篁竹間潛出剽掠事已即遁入巢山

多蹊箐官軍屯防不易生猺在窮谷中不與華通
熟猺與州民犬牙或通婚姻白猺大類熟猺黑猺
大類生猺又大良猺有戶口版籍較民淳朴租賦
尤易辦其俗敦厚人至其家不問識否輒具牲禮
任大嚼劇飲無吝意後被撞殺占逃散去之城廂
村落傭耕樵採為食

撞

撞與猺雜處元至元間來自湖北或曰非也荆蠻

故無徭撞名徭徭也粵右土著先時就撫籍其戶口以充徭役曰徭撞撞也粵之頑民性喜攻擊撞突曰撞故徭人易馴撞人難治撞俗與徭畧同而性特剽悍魁結貫耳富者男女皆以銀作大圈加頸男衣短窄裂布束脛出入常佩刀女衣不掩膝長裙細褶綴五色絨於襟袂裙幅間善涉水手撮裙幅視水淺深以次收展男女齒等以衣帶相贈遺謂之結同年既嫁則不復相聞葺茅作屋而不

塗銜板為樓上以栖止下頓牛畜謂之蔴攔席地而炊搏飯掬水盛夏露處冬則圍爐達旦無床衾宴客以肉盛木具或竹筭均人數而分置之罷則各攜所餘去分肉或不均銜之終身莫解有所要約必以酒肉或殺一狗得肉少許酒半酣雖行刦鬪狠無不願往也刦物不論多寡敝衣金甌之屬罄捲而逃官司覺治莫知其亡處先出重金購之名曰買線戚屬利得金輒以所匿告往而成擒又

好掠縛人入山谷中剡大木中鑿為竅納一足械
之索貫聽贖伏草射人攻剽村落為患於民自昔
為甚然獐亦有生獐熟獐與生熟獐大抵相類云

獠

獠無姓字以長幼次第呼之丈夫稱阿葛阿段婦
人皆稱阿等阿孛依樹積木而居好相殺害嘗伏
道中伺行旅客無徒耦過輒出擊殺而懸其屍庭
中召鄰里歡歌飲酒稍就割食之其俗畏鬼神所

殺之人美鬚髯者剝其面膚籠之於竹及燥號曰
鬼鼓舞祀禱以求福利又山獠今在左江溪峒之
外以射生為活蟲豸動者皆可食無版籍部勒或
曰獠燎也好夜獵集炬以照故每邨推有勇力者
曰郎火餘俱稱火蓋猶燎之義也

獠

獠男女俱挽髻前銳後廣覆以白布績麻為衣無
刺繡經年垢積不一滌除善伏弩獵山而食兒能

騎犬引弓射雉兔掘鼠少長習甲騎應募為狼兵
善雞卜其法取生雞雄者折一翼東嚮去翼膚肉
視骨骨有紋路明則吉暗則凶以定嚮往性饕餮
血食腥穢狼藉居室中卧惟席草是名狼也亦有
熟狼居瓦屋種稻田嘗出市山貨與民無異

矜

矜者另也諸蠻之外別為一種大藤羅運山中其
幽崖巖谷是生矜人不室而處饑拾橡薯射狐掘

鼠蠶蠱蝮蛟甘生如薺卉衣鳥言重譯乃通又矜
外曰狙其風罔聞

狄

狄人俗亦類獠而頗黠桀性能耐寒故曰狄濱河
傍溪嚴冬裸而獵魚其見官長不知跪拜以跣跌
為禮

秒

秒亦狄類傍河沙岸作蓬而栖獵魚蝦生啖之所

謂不火食者也善探地氣以知水源水將暴漲則預徙去之緣江邊流無有定在水涸石螺蚯蚓皆可食

狇

狇來自黔中蓬頭跣足以布幅蔽腰旁無襞積曰桶裙花布者曰花狇紅布者曰紅狇各有族屬不通婚姻殮有棺而不瘞置厓穴間高者絕地千尺又打牙狇慄悍尤甚父母死則子婦各折二齒投

棺中以為訣又剪頭狃男女髮時時剪之留寸許
人死則積薪而焚擊鼓跳躍謂化去不死或曰狃
吃也口語拗澀不可辯或曰挺而走險仵然壯也
故以狃名

狃

狃蓋獠之頗類人者也目圓睛黃長僅三尺許履
險攀木捷如猿猱以小敵大曰狃昔有蠻酋蒙密
者率數十巢山居畜之備驅使衣以敝絮飲以醜

酒食以鯁蚓抗輒喜舉族受役至死不避嘗出擊
山獸所獲悉輸其主

狎

狎人黔南之界地接生苗往往有之羣鬪不勝則
以首觸撞若羊生理一切陋簡荆壁不塗葦戶不
扃男子計口而耕婦人度身而織暇則漁獵為業
婚聘以犬相遺父母死焚其服御謂之送葬

狢

狢人所居谿峒又謂之峒人椎髻首挿雉尾卉衣
善音樂彈胡琴吹六管笙長歌閉目頓首搖足為
混沌舞衆歌以倚之性不喜殺蠻之有狢猶蠻之
有大良云其俗貴少賤老斑白悉拔其鬚春時常
以巨木埋地作樓高數丈歌唱者夜則緣宿其上
謂之羅漢樓羅漢者惡少也

猥

猥自稱曰猥而不好田作販薪糴穀家無宿舂男

子年三十以往乃婚或野合終身不配為人傭保

狝

狝女黑齒黥面繡額為花草蜻蜓蛾蝶之狀記所謂雕題漆齒者也嫁則自荷傘戒徒聚族數十人送之在深谷者為生丁黑丁雜民處者為熟丁白

丁

狸

狸本出廣州而蒼梧鬱林諸郡間亦有之蓋粵東

黎人之種訛而為狸也俗愚悍不愛骨肉貪財貨
牛犢得牛不盡耕作常屠食之求人貸牛以妻為
質或易其子隣里負其家財不時還乃謀於父兄
食毒草投所負之家死馬父兄宗族往而讓曰汝
負我錢更殺我子今擊汝債家懼以牛犢財物謝
之數十倍遂自收死者罷去不恨又一種性俗頗
與獍同而重信約商人入山貿易與之無欺則款
如至戚有所稱貸不吝歲望其一來而不來則數

數念之或負約不至自一錢以上雖數十年後遇
商人之同郡者至共擒之以為質俟前負者來償
乃釋負者或遠或死無辜被繫累歲月至死乃已
被繫家人往負債之家痛詬責償或鄉黨率斂為
償始解凡負債一緡次年倍償兩緡倍至十年為
千緡以故人不取負其一錢客或誤殺其一雞則
鳴鼓告衆責償曰某客殺我一雞當償一鬪一鬪
雌雄各一也一雄為錢三十一雌五十一鬪每生

十子五為雄五為雌一歲四產十雞併種當為六
鬪六鬪當生六十雞以是倍計展轉十年乃已誤
殺一雞雖富商亦償不足故客來其家無敢稍動
其毫髮者

苗

苗人自為一類其女善為漢音操楚歌挂釵畱客
能為鸚鵡舞生女則還母家曰一女來一女往

山子

山子無版籍定居男女黎黑徒跣斫山種畬或治
陶瓠為活田而不糞不曉火耕耕一二年視地力
盡輒徙去又謂之山徭

蜚

蜚人瀕海而居世世以舟為宅貧者架竹為簾無
土著不事耕織惟捕魚供食或編蓬水滸其種有
三取魚者曰魚蜚取蠨者曰蠨蜚取材者曰木蜚
又能辨水色以知龍居故蜚人神宮畫蛇以祭自

云龍種藉稱龍戶莫登庸其種也

浪

浪本鄰省亡命者來自粵東曰陽山人自湖南曰
麻山人自交夷曰隆人均謂之浪受撫則為浪民
否則逃入大澤為羣盜謂之浪賊狀類獠而獷悍
甚於獠柳慶太諸郡間有之

宋史蠻俗鑄銅為大鼓初成懸庭中置酒以召同
類爭以金銀為大釵叩鼓去則以釵遺主人號有

鼓者為都老衆推服之

虞衡志馬援於交阯得駱越銅鼓鑄為馬式按蠻俗最尚銅鼓相傳即伏波所遺時有掘得者其製如坐墩空中極薄而堅花紋細縵甚精古四圍有小蟾蜍昂首環向受擊處平如鏡面稍厚叩之擊擊如不作銅聲蓋南方易雨而銅鼓經霖潦濕露其響尤清越云諸蠻戰陣祭享合樂皆用之

瑤人樂有銳鼓狀如腰鼓腔長倍之上銳下侈亦

以皮鞵植於地坐而拊焉

嶺南蠻習在昔婚姻不正桀而黠者竊人妻女以
逃轉移他所安居自若謂之捲伴言捲以為伴侶
也已而復為後人捲去至有歷數捲未已者其舅
姑若前夫訪知所在詣官自陳官為追究往往所
謂前夫亦是捲伴得之復為後人所捲唯其親父
母兄弟及初娶者所訴即歸始初被捲之家見范
成大桂海虞衡志今則此俗盡變矣

蠻弩諸峒犛特為長技以硬木為弓椿甚短似中國獵人射生弩但差大耳取蛇毒草合藥濡箭鋒中者立死又一種名偏架弩無箭槽偏架而射也兩江溪峒諸蠻無少長咸佩刀一鞘兩刀長二尺餘跬步不捨寢食不離性與習然也

嶠南瑣記云粵蠻交易初無文券多用木刻長短大小不等穴而藏之其文各以事異漢人莫識也又具有仇欲復或行劫掠約日集事先期挿木於

山最高處謂之挿牌偵知者亦得預為之備

赤雅云撞人善雞卜其法不一以雄雞雞執其兩足雞匠焚香禱祈占畢殺之拔兩股骨淨洗用線束之以竹筴挿束處使兩骨相背端執稱祝左骨為儂儂者我也右骨為人人者事也視兩骨側所有細竅以小竹筴長寸許徧挿之斜直徧正任其自然以定吉凶其法有十八變直而正近骨吉曲而斜遠骨凶漢元封二年平越得越巫適有祠禱

之事令祠上帝祭百鬼用雞卜斯時方士如雲儒
臣如雨天子有事不昆命于元龜降用夷禮廷臣
莫敢致諍其術豈有可觀歟

張師正倦游雜錄云蠻婦生子輒取其胞衣淨濯
細切五味煎調之召至親者合宴置酒而啗若不
預者必致忿爭

溪蠻叢笑云獠婦生子經三日便澡身於河返具
糜以餉壻壻擁衾抱雛坐於寢榻謂之產翁其婦

亦無所苦炊爨樵蕪自若

胎髮不薙長大無梳篦不裹巾蓬垢擊擊自古已
然曰椎結

不乃羹以牛羊腸臟畧擺滌作羹以饗客臭不可
近客食之既則大喜不乃者反切擺也

搔獠寢不置床冬不覆被以三叉木支荆棘而泥
之燃火灸背土焦則易故膚多黎黑展轉數易謂
之骨浪

山獐穴居野處編茅以庇風雨轉徙無定去則火
之炙地使饒疊石為記一二年乃復來謂之打寮
甲與乙有隙兩相鬪敵背牌護身遠以標鎗鎗盡
挺刃而前謂之對刀

獐人好殺一語不相能輒挺刃而鬪鬪或傷其一
由此世世為讎然傷男子讎只二姓若傷其婦而
婦之父母伯叔兄弟皆怨家矣借人助殺謂之洗
面人與其婦通以牛酒謝罷謂之洗粧

嶺表錄異云南方草木可衣者曰卉服績其皮者
有勾芒布紅焦布績其花者有桐花布瓊枝布婆
羅布又古貝木其花成對如鵝毳抽其緒紡之與
苧不異曰吉貝俗呼古為吉也多紫白二種亦有
諸色相間者蠻女喜織之丈最煩縲間出售城市
值最貴自衣則謂之斑衣種女劉禹錫蠻女鉤輈
音蠻衣斑爛布然今之撞錦實綿為之而雜以五
色蠶絨非盡草木也

青箱雜記云獐俗相呼每以各人所生男女小名呼其父母元豐中余任大理丞斷賓州奏案有獐人韋超者其男名首即呼超曰父首又韋遨之男名滿即呼遨曰父滿韋全之女名插娘即呼全作父插韋庶女名睡娘即呼庶作父睡妻作媠睡

獐人失牛追躡牛跡所至遇村落即責村之甲老曰牛至爾村請為代緝甲老更躡牛跡又至一村責亦如之迭更數村而牛跡漫滅不可尋則曰匿

此所矣返報失牛之家糾衆往而大譟必令最後所至之村倍償乃已此習至今猶然

解牛多俚婦亦曰屠婆縛牛於木數之曰某時牽汝耕田不得某時乘汝渡水不即行今何以免死乃殺之

漢書板楯蠻傳秦昭襄王時有白虎為患王乃募國中能殺虎者賞邑萬家金百鎰巴郡閬中蠻人善作白竹之弩乃登樓射殺白虎王嘉之而以其

蠻人不欲加封為刻石與盟曰項田不租十妻不
役殺人得以俛錢贖死他日秦犯蠻輸黃龍一雙
蠻犯秦輸清酒一鍾今徭獠交易及兩造息詞亦
云如有翻悔罰與龍角一對蓋本諸此

桂林守錢元昌粵西諸蠻圖記日記云雕題鑿齒
有不火食者則南方曰蠻也滇黔巴蜀楚粵之間
區落綿亘接於西戎而粵西山谷奧險阻絕厥類
尤繁派別支分則曰徭曰獠曰狼曰狔曰獠

曰狇曰狝曰狢曰狣曰蚤曰土人曰隆人曰陽山
人合其類而十分之則獶居四猺居三狼居二餘
僅得一焉其在唐虞謂之要服但與要約而已歷
代以來率多梗化迨我

聖朝德威遠播薄海內外一道同風蒸然丕變雖其居
處服飾飲食男女之際與華俗不同而澹泊純樸
之風亦於此見焉可約舉而記之也諸蠻皆耕田
而食常以粘米作粥時時飲之取雜菜及牛羊皮

骨久溫成醬以佐餐雖家畜雞豚而不輕食肉水
田低則稱田旱田高則稱地田皆種稻地種雜糧
間有種旱禾雨水足即豐收謂之靠天田禾有早
晚隨月而名如六月禾八月禾也然歲止一熟非
似粵東兩收水田之中多喜栽芋食芋可當飯也
秋收後燒山以除百毒二月啓蟄焚草漬灰以肥
土然後種植耕用牛溉用車亦用肩男耘女籽無
懶惰穀或剪或刈皆出女手製酒以米和草子釀

之味極甘畏薜茗之苦渴惟飲水而已男女皆衣
布色尚深藍間用青皂無裘葛其卧具尤草率遇
暑熱則頻浴於溪冬寒則圍爐徹夜男子多雜髮
亦有髡其四圍者髮或辮或髻或挿簪或挿雉尾
鬚或去或留耳或垂環項或鎖圈各隨其鄉之所
尚頭以布裹或繡或素戴笠者居半衣及腰而止
稍長亦露膝禪自襦以下分裁布條斜裹至足亦
有着禪而另束脛者腰繫巾好懸銅盒貯烟佩小

刀極利謂之左挿足跣偶着草鞋其有雜髮戴帽
冬氈夏髻寬袍大袖白行纏而履者惟全州西鄉
徭有之而興安獐人亦有戴馬尾尖帽者蠻女髮
密而黑好縮大髻多前向亦有橫如卷軸者有疊
作三盤者有雙髻者未嫁女也嫁則一髻上紮大
梳或銀或木或牙花簪圍挿多寡不同隨貧富也
髻上或覆布或花巾或笠笠製極工常以皂布裹
邊半露其面耳皆帶大環環下間垂小珥項帶銀

圍胸或掛銀牌身著青布衣多緣繡亦止及腰內
絡花兒敞襟露胸以示麗亦有聚鵝毳為毬綴衣
以為飾者禪短而裙長不禪者半馬裙色皆深青
亦以繡緣襞積頗繁行則扱左右於腰腰多束花
巾懸荷包性亦喜吸烟每以烟筒挿髻足趺與男
子無異有喜慶間亦著履非擔負而出則攜長柄
傘花巾油扇步趨輕捷涉澗越嶺高深不怯其以
白布蒙首腰繫大帶衣純束素不喜彩繡者狼女

也衣綴羽下無裙而纏脰者矜女也惟傜之中獨有以裝飾之異而別其名者如耳垂聯環髻掛攀珠髻裏蕉葉不裙不袴惟以布幅圍其前後前短後長坐地則兜之名曰平地傜髻掛銀絲直垂至項名狗鈴傜戴梳於頂狀如扇面名曰梳傜頂以木板板列簪珠纒若綴梳名頂板傜簪竹箭二根長二尺許覆以錦穿林入莽頻側其首翩翩若蝶名曰箭桿傜以豪猪鬃為簪加以竹片雙分鬢後

剪剪若燕尾者名曰燕尾搖以木皮絆額繫筐偃
僂而趨者過山搖亦名山子搖也又有以三角銀
版綴以紅絨挿於髻畔而腰結花綵者盤古搖也
蓋諸蠻皆一名惟搖之名各異且有生熟黑白之
分黑即生白即熟熟之性純於生也蠻多負山而
居或圍竹為村或依樹為社結茅築垣架板成樓
上樓人下畜獸謂之麻欄亦稱欄房男女老幼聚
處一欄子娶則別欄以居惟狼人列屋排門人畜

分左右不喜登樓耕種之暇男或採樵或攬獸或
市馬或售錦易布或彈絮助紡或執篙撐舟為篙
師其浮家江濱而止以捕魚為業者惟蠻人也女
或紡織或裁縫或染布或汲水或挑菜或劬藥或
負薪巧者或織綵成錦或擘絲繡巾或艷粧結伴
跨馬踏春立春日男背丈鼓女唱四季太平歌往
來慶賀迎春則有男扮春官女隨歌唱齊至公門
鞭牛而去者春秋社祭神於廟提筐挈筥陳設酒

醴延巫師紅袍執笏若降神然社前卑幼徧拜尊
長謂之探社倉箱既慶則爭先納賦賦畢一家歡
喜傾甕交勸酣飲竟日有相訟者集於社推老人
上坐兩造各剪草為籌每講一事舉一籌籌多者
勝蓋理詘則籌棄理直則籌存也是謂賽老亦曰
論理論畢刻木記之終身不敢負男女婚嫁亦憑
媒妁各取庚帖置甕釀酒酒美則吉結為夫婦焉
至若倚歌擇配之俗雖邇來遵禁而谿峒之隩尚

間有之當春日載陽男女互歌謂之浪花又謂之
跳月男吹蘆笙女拋繡籠繡籠者綵毬也迴旋蹈
舞歌意相映即投之報之返而約聘嫁之日前導
擔榼新婦執彩旒傘步行親戚接踵鼓吹以送之
此皆蠻俗之異於華者四體勤而百用儉樸實之
風既有足取而愚拙中亦生智巧固未得以要荒
之陋鄙之而不以中國之治治之也若夫好利輕
生微嫌必報有犯即匿固舊習之汚乃今沐浴

聖化歌咏太平有日遷善而不知為之者若黃劉古諸
族彬彬爾雅為學宮弟子誦讀之聲流於山谷漸
皆恥其俗之陋而化其性之頑更閱數年恐弁其
居處服飾飲食男女之間皆與華俗無異欲識其
種而不可得矣用是繪圖以證傳聞至於鈎舟格
磔各有土音分而譯之不能備載記云五方之人
言語不通聲名文物之地且然而况南蠻缺舌哉

廣西通志卷九十二

欽定四庫全書

史部
廣西通志卷九十三
四

詳校官給事中臣鄧文泮

檢討臣德生覆勘

總校官進士臣朱 鈞

校對官編修臣盧 遂

謄錄監生臣王元愷

欽定四庫全書

廣西通志卷九十三

諸蠻

蠻疆分隸

桂林府為粵西省會控制百蠻東北起於全州帶
灌陽與湖南零陵蠻夷錯壤南則陽朔西則永福
永寧崇崗疊嶂號稱蠻窟而附郭之臨桂西北之
靈川興安義寧大抵皆民夷雜處

國朝休養涵濡卉衣馭舌之俗漸化為衣冠文物其醇龐之風有足觀者然舊志所載亦當存之以見今之非昔云

臨桂縣率皆熟徭居三鄉男女挽髻青衣緣繡嫁娶喪葬頗近土民有平地大良高山過山之別平地徭散處村落佃田傭耕大良徭習漢文字與民雜作或通婚姻高山徭架竹木葺茅而栖種粟芋荳薯有蜂蜜黃蠟香菌山笋貨以易食過山徭數

年此山數年又別嶺無定居也獯俗丈夫尺帛綠頭婦人髻縮木梳短衣長裙俱貫耳跣足西南二鄉界連陽永多有之性好剽竊出沒兩邑間然近省地畏法故無大患云

靈川縣六都多獯七都多獯居服與臨桂畧同獯自謂盤古之裔有先有獯後有朝之諺所在耕山擇土宜而遷徙人莫敢阻然未嘗為盜以六月六日為小年蓋所種有粘禾早熟六月六日則穫也

祭田祖召同類相慶賀劇飲窮日夜而散獯俗亦如之性較獯人頗獷悍

興安縣獯居五排七地六峒及融江穿江黃栢江與民雜處男女俱青衣短袴女無裙加布幅蔽下體坐則兜之耕山為活獯人居富江俗亦與臨桂同而不事剽竊蠻俗之醇在九屬為最

陽朔縣東北曰崇富里邃崖絕巘人跡罕到之處獯人居焉偃樹為杠攀蘿結巢種糲粟黍子掘鼠

獵獸而食男子四時喜戴笠以蔽日雨曰笠頭猺
婦人作竹簪貫髻長二尺許似箭曰箭桿猺老嫗
髮上覆木版膠以黃蠟終歲乃一梳櫛梳則以髮
俛火蠟融而版卸窮一日之力曰戴版猺然實止
一種彼此易名相呼以相矜勝非別有語言衣服
也又有大源猺以所居山寨為號云諸猺性樸畧
耕山作苦有終身不鹽食老死不至城市者婚娶
以偕老宜子者為媒妁鰥而嫠及再配無出不與

馬尚齒貴德有所爭不決則推其鄉高年衆所嚴
事者往直之謂之叫老老人以為不直則罰酒食
分饗謝罷故徭人之訟鮮至官府無契書各出衣
帶一條均長短而割之半付所約半自執謂之立
脉蓋猶結繩之遺風獠人有二種來自零陵者曰
南獠來自永福者曰北獠各里所在皆有之南獠
頗知畏法北獠最為頑梗初逐佔民田已而就撫
遂給之號獠田輸稅獨輕歲久田盡鬻歸里民仍

撞佃種曰賣田不賣耕買者惡其逋租則更議給
值曰鋤口錢鋤口者賴耕糊口募他人耕而以錢
易之也歲凶輒出為盜或掠人畜入山聽贖今縣
治西南有金寶堡莊頭鬼子擂鼓巖塘陽朔峒諸
巢悉北撞盤踞明時數歲征剿乃平更名其里曰
永寧里

永寧州僻在山谷有狼獾二種州故為古田縣明
嘉靖間沒於撞賊隆慶初募那地丹州狼人助討

克復遂給田使耕俗與撞同撞人之俗皆編茅作
屋或窖地而居婚訂先書男女年庚置甕中釀酒
酒好乃娶女家聚族吹蘆笛送之歌飲達旦輒挾
女而返踰數年女長更為治粧如初嫁禮葬不擇
兆以錢擲地筮之筮吉則瘞性頑悍而頗聽約束
自古田定亂撞人誓不再犯故改縣置永寧州

古田

事詳
馭蠻

永福縣白徭散居毛峒理定二里深倚山谷俗頗

近獠而不與獠往來衣縞素以錫飾笠頂望之皆
白故曰白獠嘗出貨其山間麋鹿皮及木茵陵香
又大良獠耕織納賦與臨桂同獠亦有南獠北獠
自明正統間由黎平慶遠入居毛峒與獠角立其
俗婦人椎髻差圓絡珠為飾裙拖十幅刺花紋供
養父母視良獠為近之後為北獠占逐今存者數
村而已北獠者湖北獠也來自靖州父子異居衰
老始收養之有病不事醫藥信巫畏鬼有不平則

推牛糾衆仇殺數年不解刻木通信事迫用火灼
之以示急種類蕃息記稱永福民三獐七寶錄也
義寧縣編戶有獐里本柳州矜人元至正間募入
墾田善勁弩藥鏃分遣守隘但納賦復其差故別
置獐里亦其俗類獐云縣治西北邊分上中下三
寨則皆獐人所居性慳鄙山田瘠塿歲不再熟一
歲所收害而貯之計口授食客至其家既飯客則
已自忍饑慮妨明日食也然能蓄藏凶年不出為

患極北則七十二團向為苗蠻巢窟今設頭目以
約束之屬諸桑江巡司雖皆懾服然接湖南之城
步蠻山險巢深亦不可忘戒心焉

全州有西延洞蠻今置西延司皆瑤人聚處以布
繚頭紅布者曰隘瑤青布者曰令勾瑤績木皮為
鎧曰狗瑤而令勾瑤最獷悍又建思二鄉亦雜瑤
人風俗與民無異男着冠履女工機杼有遺子就
學列博士弟子者

灌陽縣舊隸全州民七徭三散處歸化上下二里
性樸易馴土民募使佃作嘗役屬之謂之佃丁

平樂府府江兩岸故徭獞淵藪也恭城而北昭平
以南介處桂梧為粵西重鎮比年羣夷嚮化窮陬
奧谷靡不蒸蒸顧前明三峒諸巢之亂富賀煽搖
而修荔永安承其敝豈非以山多豁峒地雜頑苗
憑依險阻夙號難治者耶

平樂縣諸徭內連樂山外通府江深冲複嶺不易

窮詰其種皆散處林麓貯粟巖竇男女服飾與桂林獠同夜宿短衾露足不欲酣寢恐人之謀已也好鬪狠或誤殺人者以牛畜為償至數十頭曰人頭錢又性能耐饑啖鹽數顆草木皆可食

恭城縣附縣八村民獠雜處民村十獠村三十五獠村五皆遠鄉也各設頭目鎮之

富川縣有三獠曰七都獠上九都獠一六都獠本來自黔中五溪散處三十六源田占沃饒每田四

畝僅輸民稅一畝賦而不役多種綿花豆麥苧麻
及燒灰炭以市利縣之屋宇薪爨待鬻焉猜忍仇
殺男女答歌相配犯姦者罰銀謂之挂紅

賀縣徭與平樂同或謂來自五溪言語嗜欲與民
異山坳水埭間為巢居冬寒少用布絮採枯柴爇
以薰灸故多黧黑每年迎春出城市婦女操徭音
男擊土鼓以和之官府犒魚鹽以歸犗初亦谿峒
野氓就編戶者謂之熟性稍馴遠者謂之生慄悍

難制

荔浦縣猺所居皆山谷疾病惟事巫覡吹牛角喪葬用長鼓以手擊之截竹筒而炊獵山獸以續食撞則來自柳慶古田散居於咸亨通津四里其狀貌衣服俗尚頗與撞同但撞婦裙長有七八幅而猺婦之裙短只三幅按縣治三百村撞猺得十之九焉然畏法重信約無甚狡猾猶為可制云

修仁縣正東自曉村而南俱猺所居不通舟楫又

有秀里金峒等徭悉高山叢疊不與土民往來正西老縣村至寨堡為石牆汎去汎五里曰頭排至五排十排峯巒險僻自石牆西而南曰九排七排八排六排則皆獠人性頗悍愚類北獠修於府為下邑故蠻俗猶不盡變焉

昭平縣東北有南峒徭西北有古皂徭嶺阻徭立龍徭而西南有花州徭皆以山寨命名耕山採樵為業地多險隘各置徭丁守之諸鄉則民獠雜處

思來里北陀四十里一峯陡立左九冲右鹽山至
峽口而會於江四圍如列劍戟原為獞藪其諺曰
寧食粥稀不見官司亦可想其淳樸也

永安州民居三獞獞居七獞居深峒中不供稅役
婦人椎跣斑衣交手為禮不識拜跪獞則與民雜
處男女唱歌婚聘用栴榔病則屠牛賽鬼

梧州府史稱吳起相楚南併蠻越遂有洞庭蒼梧
是諸蠻之內屬未有先於梧者也今其地為二廣

交會襟山帶河梯航所通無不賓服然而懷岑藤容之間叢巖盤澗故夷獠之所宅處遡厥風尚又多可譜

蒼梧縣徭居大山中遷徙無常伐木為業謂之刀耕性醇樸獠則自為一種俗輕悍獷戾椎髻炙蹠刻木為契不事詩書男女裙衫多以絨繡居外峒者與民雜居深山者與獠雜按縣治連接西寧封開岑賀等地其長行須羅鄉諸徭設七山大營以

鎮之又石硯九山十二峒老君峒六寨諸徭設大塘營以鎮之而北陀東岸西岸則皆獞人也明初叛服不常近皆斂戢向化不復為患

藤縣瀕河者曰漁蜚操舟獵魚為業在山者曰徭獞耕作採樵性悍嗜利徭在永順鄉之二十一二都及永化鄉二十五二十八都地至於大黎里楊峒里大任里皆獞人也明成化十三年就撫輸編戶

容縣犷獯椎髻短襦穿耳灸蹠婦人跣足入市與
男子貿遷性好流徙家無蓋藏人死則焚其骸收
燼置甕中隨地瘞之謂之火葬大約犷與獯雜處
風俗亦同所居曰六便六青曰龍墳山雞籠山東
葉山東瓜山石羊山橫山各有酋目隸屬而石羊
山獨蕃盛山巢崎險明時有駱廷鳳曾廷旺劉德
厚等倚山剽掠萬歷六年始招服

岑溪縣連城鄉上里為平河等二十村中里為大

峒等四村下里為佛子等五村皆徭人所居椎髻
文身言語拗僻嗜冷食山棲露宿不畏嵐瘴惟畏
痘疹中者輒徙家避去有事則折箭斫錢以為約
誓豪民募使耕山謂之招主官府勾攝不聽命招
主諭之則往又六十三山幽僻阻險皆諸徭蟠據
時為民害萬歷九年設連城北科等營鎮之
懷集縣犬牙東粵而北接連州之八排昔苦流劫
實蠻藪也銅鐘古城金鵝松栢為賊之門戶三山

石田為諸山適中各巢穴出沒之所萬歷十二年
獍目嚴秀珠煽亂討平之田盡入官設兵耕守

潯州府治襟帶兩江向為諸蠻窟巢藤峽之役於
今為烈蓋百粵中一天塹也東跨平南無峻嶺絕
巘故其俗馴西控貴陽則五山盤折自昔負固故
其俗悍扼險而治是在得其要領

桂平縣狼狽雜處多狡悍語言駛舌衣短衣尚青
藍蓬頭跣足婦人則以紅緣兩截作裙男女喜謳

歌唱和好戲謔其婚姻不知漢禮又一種號為山子皆姓槃關山種植揜取禽獸而食嘗其土淡則遷去之

平南縣一川三里俱民徭雜處烏路里民徭狼雜處歸政里民狼雜處力耕節用不憂凍餒又大同里多徭獠明化里皆徭人其性尤馴但接連象州永安藤縣密菁深林逋逃亡命者常依之設兵彈壓又有徭目為之巡管皆務農守分云

貴縣五山九懷狼獾雜居性淳頑不一男子椎髻箕踞出入佩利刃女不髻不履短衣繡裙婚姻多索肉為聘送迎以答歌為歡獠人則名山子居深山不賦不役砍山而食善射獵伏弩搏虎得虎則輸之官

武宣縣東鄉之峽江花靈花周花樊等村皆獠人西鄉之平畚新田漁埠金雞等村皆獠人南鄉之分嶺峒嶺等村接貴縣界北鄉之盤古牛欄等村

接來賓界皆獐人也獐頗輕悍獐次之獠最樸謹
斑衣烏言導淫尚鬼則槩相似

南寧府為嶺南一都會俗雜多賈司馬遷所謂珠
璣瑋瑁果布之湊非裸國也顧史稱嶺度而西橫
袤千里與夷獠錯壤者三十六峒達於海外羅殿
諸蠻今所部十有二屬而土州峒寨得半焉然咸
受冠帶輸職貢蓋於中州蓋其地昔稱邕管夷裔
嚮化與桂郡實相伯仲

宣化縣徭一名輦客有四姓槃藍雷鍾男女皆椎
髻跣足結茆為居刀耕火種撞俗男子髡髮留大
髻以笠空其中覆頂史記所謂尉佗懸結者也男
女衣皆尚青盛服則錦兜花裙綴以古銅錢丁當
自喜少者倚歌擇配歌意洽乃歸告父母倩媒以
蘇木染檳榔為聘婚之日女家作汲桶竹杖給女
往送之既至則其夫擊女背者三女乃出桶杖擔
水供炊旋回母家閱數歲始歸為夫婦蠻人有五

姓麥濮吳蘇何以舟為居無土著唯捕魚裝載以供食

橫州民一撞三撞俗佃田與民雜處山子則散居震龍六磨諸山無版籍定居惟斫山種畬鋤木器射獸而食之男女皆徒跣婦人大髻重可數斤

上思州那懶墟及那標上下洒三村徭獍雜處好剽竊往往多事今亦漸革焉

新寧州舊為諸苗地語言侏儻少諳漢語男括髮

以布女椎髻垂額俱跣足不履飲食則盤膝就地
啜冷咽生婚姻多同姓疾病禳鬼歌舞屠狗蝥食
而散所祀鬼或曰即婆婆樂神也

隆安縣獠謂之峒人猶他縣之稱山子也無版籍
穴處巖竇耕樵獵獸而食性愿謹風俗與民無大
異先時避寇者常依之

永淳縣獠人居皆茅屋短簷中架竹木上居男女
下飼牛羊飲食不擇毛腥風俗通云百粵之民以

蛙為上味是也

歸德土州有隴版徭耕山種畬男女喜歌唱無音
樂各出巾帕踰躑而舞又明正德間募狼人殺賊
以賊田給之世世為業設狼目總馬惟應調遣不
供雜役

果化土州土徭架木為屋曰欄房裹頭跣足短衣
長裙男耕女樵言語拘僻不可辯

忠州土州剝布淥燕郝章郝佐等村多徭男女趨

墟不知禮義

太平府古駱越地蠻獠居之唐以來為羈縻州峒
改府置流官自明始今牧令之司世職強半焉說
者謂之夷治夷非也昔之首長大都故絕或坐法
削除其存者則皆征蠻時江淮齊魯間從戎之士
大小各以邊功受賞邑故能役屬其土著盡如中
國之教云

崇善縣三廂十屯六十三村土狼雜處居亦欄房

椎髻徒跣婚葬炙牲鳴鑼以召戚屬疾病不藥惟
事巫覡佃耕郡中豪者田謂之田丁征調則為土
兵改流以來奉約惟謹

左州土狼椎髻蠻音多處山峒誅茅為屋掘鼠為
箔繩樵甕汲率皆婦女訟牒少聞稅無逋負

養利州土狼架屋兩層上居下牧支石作竈操剪
以割截竹為筒以汲水春夏採薇蕨野菜作食男
子尺帛束頭穿革履婚姻擇曠野宴會喪用鼓樂

病鮮求醫

永康州狼俗與左養二州頗同城東郭有墟市婦女挾粟布貿遷男子襁負而隨按太平比年應貢士永康為最狼人間有習漢文書者

寧明州新設流官民皆土猺男子初婚別欄另爨俗多樸鄙

太平土州分三街七甲皆土狼也密邇府城人知畏法

安平土州西接交趾舊為莫夷蠶食今存者四十
四村皆狼人習弩善擊刺頗能自衛

思城土州治有二廂亦狼人在內廂者俗淳在外
廂者俗鄙男耕女樵尚鬼畏誓

萬承土州地僻土饒狼人僇力田作

茗盈土州與全茗土州相距二里許皆狼人風俗
狹陋性情慤謹

龍英土州所部有二峒四季二飯及陸地等村皆

狼人設狼目統焉人多悍頑喜鬪

結安土州亦狼人壤地褊小種山而食瘠苦多貧
佶倫土州與結安接界風俗亦同

都結土州猺狼雜處樸馴畏法

江州土州界府之南民猺雜處男則力耕女反逐
末蠻俗相沿未能化也

思州土州有猺狼獾三種婚以踏青為媒葬亦歌
舞而送

上下凍土州古地名凍江壤接交夷人多愚獷

下石西土州與上石西州相距不數里戶皆狼人

地接交夷風俗荒陋

憑祥土州所統皆狼兵也人習弓弩戶多蓋藏

羅陽土縣地多狼人火種刀耕暇則獵較

羅白土縣境壤促狹元明俱隸屬江州土風沿染

荒陋多頑粗知耕作

鎮安軍民府本轄於思恩斗絕孤城靡有屬邑而

隸以世襲土州者五東曰奉議西曰歸順南曰上
映向武都康廣袤亦數百里枕雲南俯交夷蓋去
省會益險遠矣苗疆重地無踰於此守臣改置流
官其深有得於鎖鑰西陲之義乎

歸順州無鹽常漚灰取水以代男巾布裸足必潔
飾其裙而後敢見長上女衣短裙以茜草染齒令
紅以示麗父母死闔室子女以杵舂白糲擊成聲
名為化者春行糧每遇節慶用葉裹米為粽相獻

餽其粽之大有裹米數觔中藏猪雞鴨肉者

奉議州諸苗皆稱土人僻處林谷種旱稻及靛多以染為業好蓄藏每歲終作窖於山隅或水澆貯禾以備歉收

都康土州探人苗人男子以布繚頭暑猶被毡大領短裙女則出戴箬笠衫短齊腰裙長委地不諳漢語婚葬輒殺牛為宴祭

向武土州徭人稻田無幾種水芋山薯以佐食男

婦草履竹笠短衣長裙元旦互攜酒肉至親隣家
謳歌十日乃已冬日焚山晝夜不息謂之火耕

上峽土州多狼人種山獵獸食生飲血取牛腸渣
滓以為美汁然性頗馴不事竊掠服役輸賦謂之
熟狼

下雷土州男子裹頭婦人戴笠言語土音衣服樸
質結茅而居酸糟作味不慣食鹽喜種作春夏男
婦偶而耕秋則斗酒隻雞親戚相勞苦稱淳俗焉

柳州府居粵右之中諸蠻要害故建提鎮駐節於此為能控制兩江以舒南顧厥制善矣今考融雒象州以東交錯桂平固多猺獞而羅城懷遠以北界接黔中亦雜苗狼馬平則附郭而柳城即柳州故治也唐柳宗元曰嶺南夷落於柳若棄壤謫者先之夫風俗與化移易烏知今大異於古所云而惜子厚之不及見也

馬平縣去城十里則有獞百里外則有猺然耕田

卷九十三
輸賦皆熟，犛熟、獠也。又二種：狔、風俗陋簡種山捕野獸時至墟市貨賣。

雒容縣獠人與狔狼雜居，性剽悍，距永寧常安鎮僅隔一水，明時數與賊通俗好劫掠，屢征乃平，今頗知向化。

羅城縣東一西一西七西九東五平東上里咸狔種，平西布政高懸里咸獠種，郡那等四堡咸狼種，獠俗較狔狼為頑悍，又通道鎮有苗犛男子衣服。

與漢無異婦人衣左衽至腹裙有殺至膝用五色
彩絨織繡邊繫古銅錢步行有聲伐山火食名為
自在

柳城縣上油峒諸巢皆蠻窟也其種有獯猺獠獠
言語各不相通而其俗尚鬼導猺大概相似

融縣猺獠甚夥有獠村猺村或分地而居或彼此
相錯猺有紅黑白三種乃諸葛武侯征孟獲流入
背江居者其山中多虎豹猿猴有啞泉在水冷峒

融之竹木俱產此焉

懷遠縣夷有猺獞狗矜担苗六種耕田納賦謂之
住猺種山而食去來無常謂之流猺獞人則男女
皆斑衣長僅至臍裙不過膝好樓居甌爨俱在樓
上如北果等村是也苗人則男女俱穿耳男頭挿
白雉尾以銀箍圍額銀圈飾頸手戴銀鐲裙用六
幅青布不縫掛於下體其長過足即用為脚纏不
識文字或賣田地以木刻記之飯無碗箸手按作

團和以魚酢則為上食宴客殺牲用剪不用刀砧
如大營峒梅寨等村是也獐狝亦如之如永吉三
峒等村是也担人居山谷種植山禾每日薄暮始
舂粟無隔宿之炊單衣不利於寒長袴不利於走
較諸種最為愚弱近日開通都江河道梅寨等村
為古州要路協運兵糧更番防戍經其地者絡繹
不絕苗民率皆恭順村落之間時有塾舍書聲則
豈猶雉尾挿頭青裙過足之舊習哉

象州東界修仁荔浦南界武宣桂平西界來賓馬
平北界雒容諸邑各有犺撞故州之各鄉多其種
類男女椎髻徒跣截竹筒而炊待雨而耕每歲十
月屠牛置酒召同類以降神醉則舞刀劍為戲睚
眦結怨報復不已其天性也今亦漸化其舊俗矣
來賓縣近城皆居民出郭十數里外則皆撞人矣
男子繚頭跣足婦人短衣長裙性好仇殺官司勘
報無虛歲捕逮至中途則集衆劫奪而去相生伏

法不悔也徃徃此獄未能奏當而他獄又起稱巖
邑焉

慶遠府處粵西偏自昔用武之地附郭宜山而外
北為天河地盡徭西則思恩河池亦號蠻藪而西
北之荔波極西之東蘭尤諸夷奧區其他谿峒長
官附庸州縣者相望也舊志稱其石壁巉巖關隘
險阻於嶺南為最雖營汛星列而虎狼環在四郊
未雨而深網繆之慮有以哉

宜山縣撞人男衣短狹色尚青老者衣細褐婦女則小袂長裙繡刺花紋其長曳地歲首祭先祖擊銅鼓跳躍為樂仲春男女成列入山谷中相悅者負之而去遂婚媾焉矜則另為一種性習居處服食及婚葬畧與撞同編入版籍供賦役亦如熟撞但語言差異耳

河池州徭撞十居八九婚姻以牛為禮視貧富自一頭至三四頭不等嫁時不置衣被其女過宿即

回母家七月十四日謂目連節備物祀先老幼皆
閉門不出路無行人名曰躲鬼嘗以山中老樹高
蔭處所為天神廟土人非潔齋不敢入交易刻木
為齒作券謂之打木格買田不立戶名但買某戶
田畝即充某戶田丁輸賦其力作及走墟市大半
皆由婦人謂之坐男使女

天河縣多夷種而散處四境者又各不同東則為
矜獠名曰姆姥南則狼種性稍淳朴北則畧與華

同呼為百姓婦人服飾無老少色尚紅裙作細摺
厚累五層重數觔婚禮媒妁議允男家先擔酒肉
置路傍女族少長經過截留而飲食之以所餘者
攜歸卜日女族亦荷酒肉置前路所答復名曰會
親娶則以牛為聘獠性嗇諸多簡陋力耕作獨喜
浮屠蔬食三年謂之血盆齋言為母報恩云先時
蓬首跣足成化間知縣袁瑤禁之始巾幘草履
思恩縣五十二峒及儀鳳茅灘上中下疇皆徭獠

居之俗亦與宜山同矜人則謂之苦蕘矜山田硠
确時時苦饑每採藥負薪易粟而食

東蘭州轄四捧十三哨多苗徭改流以來敬官畏
法習俗漸馴

荔波縣有狃狻矜狃撞六種椎跣烙躡貫甲佩
刀粵中悍蠻無有右之者順治初知縣胡啓睿赴
任離縣治僅十五里諸苗不容信宿鳴鼓糾黨並
其僕隸盡屠殺之後官畏不敢入皆僑寓府城遙

領縣事而已康熙八年典史余子位竟抵其任苗
皆詫異云蒙夜結勤刀蒙刀過客麻利料利料譯
其意蓋言汝從何處來汝來作何事好笑好笑也
子位善撫諸苗在職三年卒無梗者自是遂知嚮
化

那地土州亦狼人徵調則為狼兵前明沈希儀賴
以破賊

南丹土州土狼設狼目總之性頗輕悍

忻城土縣獠狼雜處地貧俗陋

思恩軍民府古雕題地初為土州繼陞土府復改置流官隸以武緣一縣而土司之屬有九移駐府倅於古零俾彈壓焉郡治凡數遷而後定志所謂職方絕徼瘴雨蠻烟愚獠頑苗在在皆是者也

武緣縣雜民夷其俗尚鬼焚觔重財輕殺諺云樂昌喜詞訟永寧尚干戈蓋夷俗云

賓州柳屬邑也柳之為郡獠七民三而賓州以南

厥類實夥尤稱獷悍郡守遠在數百里外兼顧為難故割來遷上林等邑隸賓州而陞賓州為直隸焉今改隸思恩案賓之蠻曰猺獠狃好殺喜鬪俗皆相似春秋二社男女畢集未婚嫁者和歌擇配兩意既洽各以所執扇帕相博為戲謂之博扇歸而父母即與成禮

遷江縣編戶上下二里悉係狼猺獠三種雜屬下里屬東南山坡平坦民亦頗淳上里屬西北層巒

疊嶂三種每依山為勢頑梗不馴

上林縣東北鄉順業里獠獍雜處又東西撫上下
一二三等圖有秀馬清水刁博猪婆各隘崇崗疊
嶂狼獠憑依昔嘗跳梁今亦嚮化

田州土州唐時為橫山郡延接鎮安東蘭相距交
趾古夷壤也迤西北曰百色市開設右江鎮實介
滇黔孔道曩時瘴烟蠻菁商賈行轍所不至土性
陸梁喜鬪握刀出入家無蓄積以多牛為富錙銖

睚眦讐殺不休

上林土縣元時附屬田州路壤狹土瘠架木作欄
房人蓄並處其下凡遇歲時彼此以紅飯粉糲作
餽蠻風鄙儂止知耕作不事詩書

白山土司鑿山而種歲止一收婦女衫短袖大繡
刺領緣徒跣無履拖細摺長裙子女數歲即為婚
配味嗜酸醕素少鹽食

興隆土司徭苗雜居鋤畬種粟每歲正月男女聚

墟市聯歌歡洽各以檳榔致贈疾病巫禱罄產勿
惜每食爛飯辣椒作鹽

那馬土司元旦以舂白覆地用木杵敲之交擊成
聲以為樂除夕以葉裹米為粽以祀家神婚娶最
早有子甫離襁褓輒為畢姻者視他徭為粗知法
紀

定羅土司徭蠻雜處上元節以杵舂槽交擊成聲
為樂

舊城土司男無頂帽綿布纏頭女無長衣夾裙拖足

下旺土司男以青白布纏頭女以竹絲為笠吉凶不易服色飲食常帶血腥家無積糧晨興杵聲喧里巷止足一日之需暇則聚歌為樂

安定土司女衣短不掩臍下曳長裙每不相續中露肌膚一圍似肉帶馬凡宴會無杯箸盤几惟以大木葉鋪地散半熟牛肉於上富者以蕉葉盛椒

鹽作調和老幼席地羣飲飲酣則唱歌飲散多鬪
毆外夷江六甲則多頑悍矣

都陽土司延緣接白山舊城興隆界前明甃十八
砦城為巖險民徭共處鑿山依水居止無定

古零土司多狼苗謂之土人性悍喜鬪出入佩刀
泗城軍民府唐宋以來皆羈縻谿峒也明置土府
世撫其衆近以岑氏貪虐易以流官諸夷懾服割
西隆西林屏障其間葑為南徼巨鎮焉郡之蠻曰

猺曰狼所居深谷耕山獵獸有酋長每歲首以篠荷麋鹿獐狐雉兔之類率所部百數十人投獻官府曰拜年酋長緯纓冬帽如時制而服則圓領大袖補刺海馬自謂先祖所遺又著草屨甚弗稱也見郡守俯伏不敢仰視其拜袖長委地拱而左再拜拱而右如是拱伏八拜乃已以示扑舞漢人莫不笑之犒以餽酒及餠餅跪飲盡酣袖所餘餽餅而去明歲乃再來

直隸鬱林州為梧之右臂割北興隆博四邑使自領之亦臂之使指也然今鬱林即古桂林稱大郡云梧多猺獞而鬱之蠻曰土狼俗頗近猺而不出為患在州東北四十里抵大容山按州治平原廣澤民居八九狼處一馬明正德間苦流寇募克戍兵其後授田輸編戶謂之熟狼

博白縣猺自明成化間平藤峽後來縣治謂之山子無戶籍散居各堡設猺總以總之狼人善用銅

礮健守石梯界牌諸隘設狼目總之皆佃田輸租
與民無異斑人有二種其一青衣長裙一則斑衣
短裙白質而靛章採樵易粟女子出嫁給琢刀一
兩副以索帶為粧具

廣西通志卷九十三